



Katika Zaburi: Sehemu ya 1

SABATO MCHANA

Somo la Juma Hili: Ebr. 9:11–15, Zaburi 122, Zaburi 15, Zaburi 24, Kut. 33:18–23, Zab 5, Zab. 51:7–15.

Fungu la Kukariri: “Kisha nikaona, na tazama, huyo Mwana-Kondoo amesimama juu ya mlima Sayuni, na watu mia na arobaini na nne elfu pamoja naye, wenye jina lake na jina la Baba yake limeandikwa katika vipaji vya nyuso zao” (Ufunuo 14:1).

Kama Waadventista wa Sabato, tumezoea kutafuta ishara za Ufunuo katika visa vya Agano la Kale ili kutusaidia kuelewa ishara hizo. Masimulizi haya, ingawa, yako mbali na chanzo kizuri pekee, lakini yanapatikana pote katika Agano la Kale.

Chanzo kimoja chenye habari nyingi hasa ni kitabu cha Zaburi, mkusanyo wa mashairi matakatifu unaochunguza uzoefu mwingi wa wanadamu na mahusiano yanayofaa kati yao na Mungu—kuanzia kukata tamaa juu ya dhambi na mateso hadi furaha isiyoziulika mbele Zake na ahadi Zake zinazorudiwarudiwa za msamaha na wokovu.

Usomaji makini wa Zaburi hutoa maelezo yanayofanya kitabu cha Ufunuo kuwa cha kuvutia, hasa Ufunuo 14, inayoeleza kazi ya mwisho ya kanisa la Mungu la masalio duniani. Watu wa Mungu wa siku za mwisho wamepewa kazi ileile kama Israeli wa kale: tunapaswa kuwa nuru kwa mataifa, wito wa mwisho wa rehema kwa watu wote wamwabudu na kumtii Muumba wao.

Maelezo kadha wa kadha yaliyo katika kitabu cha Mungu cha nyimbo yanaweza kutupa njia mpya za kuelewa na kuthamini wajibu wetu katika nyakati za mwisho za historia ya dunia.

**Jifunze somo la juma hili kwa maandalizi ya Sabato ya Mei 24*

Kuhani Wetu Mkuu

Musa aliposimamia ujenzi wa hema takatifu, hakuruhusiwa kutumia tu usanifu wowote alioutaka. Mungu alimpa ramani ya kufuata. “ ‘Nawe angalia ya kwamba uvifanye kama mfano wake ulioonyeshwa mlimani’ ” (*Kut. 25:40*). Tunagundua katika kitabu cha Waebrania kwamba mfano uliotumika ulikuwa ule wa uhalisi wa juu zaidi, patakatifu pa mbinguni.

Soma Waebrania 9:11–15, kuhusu Kristo kama Kuhani wetu Mkuu katika patakatifu pa mbinguni. Hili linafundisha nini kuhusu kile anachotufanyia?

Patakatifu pa kidunia palikuwa kivuli cha Yesu kwa undani wa kushangaza, kuanzia kuhani na sadaka, hadi samani na maelezo mengine ya muundo. Yote inazungumza juu ya Yesu.

Kitabu cha Ufunuo, bila shaka, kina taswira nyingi sana za patakatifu. Kuna kinara cha taa cha patakatifu katika aya za mwanzo, sanduku la agano linatajwa waziwazi katika sura ya nne, pamoja na madokezo mengine mengi kuhusu hekalu. Bila ufahamu wa patakatifu pa Agano la Kale, inakuwa vigumu kufahamu kile Yohana anachomaanisha katika maelezo ya maono yake. Uzoefu wa Israeli, Paulo anaandika, “yaliwapata wao kwa jinsi ya mifano, yakaandikwa ili kutuonya sisi, tuliofikiliwa na miisho ya zamani” (*1 Kor. 10:11*).

Kuna mengi tunaweza kujifunza kutokana na kuchunguza maelezo yanayohusu hekalu. Katika kitabu cha Zaburi, tunapata sehemu muhimu ya kuelewa baadhi ya maelezo haya: jinsi watu wa Mungu walivyohusiana binafsi na hekalu. Tunaona kwa ufupi jinsi Daudi alivyohusiana na patakatifu na huduma zake na tunaona mwitikio wa moyo wa watu wa Mungu kwa kile ambacho Masihi angewafanyia. Siyo tu vielelezo vinavyotusaidia kumwona Yesu; tunaweza pia kuchunguza uzoefu binafsi wa wale walioelewa kile ambacho Mungu alikuwa anatufundisha kupitia patakatifu na kujipata masomo kwa ajili yetu wenyewe na kwa uzoefu wetu wenyewe na Mungu.

Soma Zaburi 122. Ingawa hatuwezi kwenda kihalisi katika “nyumba ya Bwana” ya duniani (haipo, na hata kama nyingine ingejengwa mahali pale pale, isingekuwa na maana), ni vipengele gani vinavyopatikana katika Zaburi hii vinavyoweza kututia shime kuhusu kile Kristo alichotufanyia? Angalia mada za amani, usalama, sifa na hukumu.

Juu ya Mlima Sayuni

Katika Ufunuo 14, tunawaona watu wa Mungu wamesimama juu ya Mlima Sayuni. Mlima Sayuni wa asili ulikuwa magharibi tu ya mji wa kale wa Yerusalemu ya leo na ulichukuliwa kama makao ya kiti cha enzi cha Mungu, au kuwepo Kwake, kati ya watu Wake. Baada ya muda, mlima wa hekalu, ulio juu ya Mlima Moria, ulikuja kuhusishwa na Mlima Sayuni pia.

Kwa maneno mengine, maelezo haya muhimu kuhusu masalio wa Mungu wa siku za mwisho yanawasilishwa katika lugha ya patakatifu, kama ilivyo kwa matukio mengi muhimu katika kitabu cha Ufunuo. Ashukuriwe Mwana-Kondoo, watu wa Mungu wako juu ya Kilima Chake kitakatifu!

Soma Zaburi 15 na 24, ambapo Daudi anauliza swali muhimu zaidi: “Ni nani atakayefanya maskani yake katika kilima Chako kitakatifu?” Linganisha jibu lake katika Zaburi hizi na maelezo ya watu wanaosimama juu ya Sayuni katika Ufunuo 14:1–5. Unapata ufanani gani? Mtu anajiungaje na kikundi hiki? Ni nini maana ya ukweli kwamba jina la Baba limeandikwa katika vipaji vya nyuso zao? (Ufu. 14:1).

Maelezo juu ya wale walioruhusiwa kufika mbele za Mungu yanayopatikana katika Zaburi ya Daudi ni magumu sana kwa wenye dhambi tu kutimiza. Ni nani kati yetu anayeweza kusema kwa uaminifu kwamba siku zote tumekwenda kwa unyoofo? Au daima tumezungumza ukweli ndani ya mioyo yetu (*Zab. 15:2*)? Hakuna hata mmoja wetu anayeweza kusema kwamba “hatutaondoshwa milele” (*Zab. 15:5*). Tukisema kwamba hatujawahi kutenda dhambi, Biblia inafundisha, kweli haimo ndani mwetu (*1 Yoh. 1:8*).

Hitimisho pekee ni kwamba Mwana-Kondoo ndiye anayetuwzesha kusimama juu ya Sayuni. Mwana-Kondoo hatajwi katika Zaburi ya Daudi, lakini anatokea mara katika maelezo yanayopatikana katika Ufunuo 14. Ni karibu kana kwamba Ufunuo 14 inajibu swali la Daudi. Sasa kwa kuwa Mwana-Kondoo wa Mungu amethibitishwa juu ya Mlima Sayuni, katika patakatifu, tunaweza pia kuwepo pale kwa sababu ya haki Yake kamilifu tunayohesabiwa kwa imani. Tunaweza kuwa na “ujasiri wa kupaingia Patakatifu pa Patakatifu kwa damu ya Yesu, kwa njia mpya na iliyo hai alioianzisha kwa ajili yetu, kupitia katika pazia, yaani, mwili wake” (*Ebr. 10:19, 20*). Bila damu Yake tungekuwa na tumaini gani? Hakuna, kwa kweli.

Fikiria juu ya ahadi zote za Biblia za ushindi dhidi ya dhambi. Kwa nini, hata pamoja na ahadi hizo, bado tunajikuta tunapungukiwa na mfano kamili Yesu aliotuwekea na kwa nini tunahitaji maisha Yake kamilifu kama mbadala wetu?

Sheria Mioyoni Mwetu

Masalio waliokusanyika juu ya Mlima Sayuni wanalo jina lililoandikwa kwenye vipaji vya nyuso zao: jina la Baba na la Mwana-Kondoo. (Iwapo haya ni majina mawili tofauti si dhahiri; Yesu ndiye mfano halisi wa Baba!) “Jina” katika Maandiko linamaanisha zaidi ya lebo ambayo kwayo watu huitana; linawakilisha tabia. Hata leo, tamaduni nyingi bado zinasema kwamba mtu ana “jina zuri” wakati watu wanafikiria kuwa tabia zao zina sifa za juu.

Soma Kutoka 33:18–23, Kutoka 34:1–7 na Zaburi 119:55. Musa alipoomba kuona utukufu wa Mungu, Mungu aliahidi kumwonesha nini? Kisha Mungu alipotangaza jina Lake kwa Musa (Kut. 34:5), ni nini kilifuata?

Wengine wanaelewa utukufu wa Mungu kama nuru ing’ aayo isiyoweza kufikiwa, ambayo kwa hakika ni maelezo yanayofaa. Lakini utukufu wa Mungu ni zaidi ya udhihirisho wa wazi tu; Utukufu Wake ni tabia Yake. Ndivyo ilivyo kwa jina la Mungu.

Biblia inapowaelezea masalio wenye jina la Mungu limeandikwa katika vipaji vya nyuso zao, si suala la kuwa na herufi halisi zilizoandikwa hapo; ni suala la kuwa na tabia ya Mungu iliyoandikwa katika akili yako, moyo wako na hivyo sasa katika maisha yetu tunaakisi upendo na tabia ya Mungu. Umevutwa karibu na Mungu na unampenda jinsi alivyo na kile alichokufanyia.

Inapendeza sana, pia, kwamba Mungu anapojieleza kwa Musa, anafanya hivyo ikiwa ni pamoja na Musa kupokea nakala nyingine ya Amri Kumi, ambayo pia ni nakala ya tabia Yake. Vivyo hivyo, watu wenye “jina” la Mungu katika *Ufunuo 14* wanaelezewa kama wale “wazishikao amri za Mungu.” Kisha ona maneno yanayopatikana katika kitabu cha Waebrania: “‘Hili ni agano nitakaloagana nao baada ya siku zile, anena Bwana, Nitatia sheria zangu mioyoni mwao, Na katika nia zao nitaziandika; Dhambi zao na uasi wao sitaukumbuka tena kabisa’” (*Ebr. 10:16, 17*). Ni udhihirisho ulioje wa injili: ingawa sheria ya Mungu inaakisiwa katika maisha yetu, bado tunahitaji dhambi zetu zisikumbukwe “tena kabisa.”

Jina la Mungu ni tabia Yake. Sheria Yake ya maadili ni nakala ya tabia Yake. Na wale ambao wamekusanyika juu ya kilima kitakatifu cha Mungu katika siku za mwisho wanajazwa na upendo kwa Mungu, upendo unaodhihirishwa kwa utii kwa sheria Yake.

Ikiwa tunaokolewa kwa imani na si kwa sheria, basi sheria ya Mungu ina umuhimu gani? (Tazama 1 Yohana 5:3).

Zaburi 5

Soma Zaburi 5. Katika kazi hii, Daudi anaonesha tofauti kubwa kati ya wale waliopotea na wale waliokombolewa. Linganisha Zaburi hii na lugha ya Ufunuo 14:1–12. Unapata ufanani gani na huko kufanana kunakuwezesha kuelewa maana ya kuwa sehemu ya vuguvugu la masalio wa Mungu wa siku za mwisho?

Inaelimisha kutambua kwamba Daudi anasisitiza kwamba mwovu “hatakaa” na Mungu (*Zab. 5:4*). Lengo la hema takatifu lilikuwa kwamba Mungu apate kukaa kati ya watu Wake na itakuwa vivyo hivyo katika ufalme wa Kristo (*tazama Ufu. 21:3*). Wale wanaoweza kukiendea kiti cha enzi cha Mungu lazima wakombolewe.

Pia inafaa kuangalia kwamba Daudi anaelezea tendo la ibada katika Zaburi 5:7, ambalo ndilo suala kuu la kufa na kupona katika pambano kuu. Ufunuo 13 inataja “ibada” mara tano, na ujumbe wa malaika watatu unauita ulimwengu “kumsujudia Yeye aliyefanya.” Daudi anatuambia kwamba “anamcha” Mungu na ujumbe wa waliosalia unauita ulimwengu urudi “ ‘Kumcha Mungu na kumtukiza, kwa maana saa ya hukumu yake imekuja’ ” (*Ufu. 14:7*).

Pia angalia jinsi waliokombolewa katika Ufunuo 14 wanaelezwa kuwa “haukuonekana uongo” (*Ufu. 14:5*) katika vinywa vyao; ni watu wanaosema ukweli, ambao maneno na matendo yao vinaakisi tabia ya Mungu ya haki. Waovu, kwa mujibu wa Daudi, “vinywani mwao hamna uaminifu” (*Zab. 5:9*).

Ni tukio la kustaajabisha ambalo Yohana analiwasilisha katika sehemu hii muhimu ya Ufunuo: wenye dhambi tu wameondolewa mautini na kupewa fadhila ya kusimama mbele za Mungu. Hawakuifanyia kazi haki hii; wamepewa kutokana na ukweli kwamba Mwana-Kondoo wa Mungu—Mwana wa Adamu mwenye haki—anasimama hapo pamoja nao. Wamesamehewa, wamekombolewa; hawapaswi tena kubeba hatia yao wenyewe (*linganisha na Zab. 5:10*), kwa sababu Mwana-Kondoo wa Mungu ameibeba kwa ajili yao (*linganisha na Isa. 53:12 na 2 Kor. 5:21*).

Jina la Mungu likishaandikwa katika moyo wako, ni vigumu kunyamaza. Watu wa Mungu wanatoa wito mmoja wa mwisho wa rehema kwa “sauti kuu” (*Ufu. 14:7*). “Nao wote wanaokukimbilia watafurahi; Watapiga daima kelele za furaha. Kwa kuwa Wewe unawahifadhi, Walipendao jina lako watakufurahia” (*Zab. 5:11*).

Hebu fikiria umesimama mbele ya Mungu mtakatifu na mkamilifu katika hukumu, huku kila tendo ambalo umewahi kufanya likiwa wazi mbele Zake. Mandhari haya yanakuambia nini kuhusu hitaji lako la haki ya Kristo?

Wafundishe Wakosaji Njia Yako

Baada ya Bwana kumtokea Isaya katika tukio la chumba cha enzi katika *Isaya 6:1–8*, baada ya Isaya kuambiwa kwamba “uovu wake umeondolewa” na “dhambi yake imefunikwa,” ndipo alijibu wito wa Mungu kwa kusema, “ ‘Mimi hapa! Nitume mimi’ ” (*Isa. 6:8*). Yaani, mara alipojua kwamba amepatana na Mungu, na licha ya kujua makosa yake, alikuwa tayari kufanya kazi kwa ajili ya Bwana.

Je, si sawa na kwetu sisi? Tunawezaje kutangaza wokovu kwa wengine ikiwa sisi wenyewe hatuna huo? Na tunaweza kuwa nao, kwa imani katika Yesu na kile alichotutendea.

Soma Zaburi 51:7–15. Daudi anaahidi kufanya nini baada ya kusamehewa na kutakaswa dhambi yake?

Kuitwa katika kuwepo kwa Mungu, hatimaye, ni kutumwa kurejea nje. Katika hekima yake, Mungu amewaagiza waliokombolewa kutumika kama sauti Yake kuu kwa ulimwengu ulioanguka. Wakati fulani, mguso wa watu Wake duniani utahisiwa kwa namna yenye nguvu. Ufunuo 18:1 inatuambia kwamba ombi Lake la mwisho kwa sayari iliyoanguka litaangaza nchi yote.

“Mara tu mtu anapokuja kwa Kristo ndani ya moyo wake inaumbwa shauku ya kuwajulisha wengine ni rafiki wa thamani kiasi gani amepata katika Yesu; ukweli unaookoa na kutakasa hauwezi kufungwa moyoni mwake. Ikiwa tumevikwa haki ya Kristo na kujazwa furaha ya Roho Wake akaaye ndani yetu, hatutaweza kunyamaza. Ikiwa tumeonja na kuona ya kuwa Bwana yu mwema tutakuwa na kitu cha kusema. Kama Filipo alipompata Mwokozi, tutawaalika wengine kuja Kwake.”—Ellen G. White, *Steps to Christ*, uk. 78.

Katika Ufunuo 14, ujumbe wa malaika watatu umejengwa juu ya “injili ya milele” (*Ufu. 14:6*). Yaani, hata kabla ya kutangazwa kuhusu kumwabudu Yeye “ ‘aliyezifanya mbingu na nchi, na bahari na chemchemi za maji’ ” (*Ufu. 14:7*), au kuhusu anguko la Babeli (*Ufu. 14:8*), au kuhusu kumwabudu “mnyama na sanamu yake” (*Ufu. 14:9*)—msingi wa injili, wa wokovu katika Yesu, unatangazwa. Na hiyo ni kwa sababu maonyo na ujumbe wa wale malaika watatu havina maana yoyote bila tumaini na ahadi walivyo navyo wale wanaotangaza ujumbe huu ndani ya Yesu na kile alichowafanyia. Pasipo “injili ya milele,” kwa kweli hatuna chochote cha thamani cha kuuambia ulimwengu.

Tafakari zaidi ukweli kwamba, hata kabla ya kutangazwa kwa ujumbe wa malaika watatu kuanza, tunaielekezwa katika “injili ya milele.” Hili linapaswa kutuambia nini kuhusu jinsi ukweli huu ulivyo msingi wa yote tunayoamini?_____

Jifunze Zaidi: “Zaburi za Daudi zinapitia safu za uzoefu, kutoka katika kina cha dhamira yenye hatia na kujihukumu hadi imani ya kwenye vilele na kuzungumza na Mungu kulikoinuliwa sana. Taarifa za maisha yake zinatangaza kwamba dhambi inaweza kuleta tu aibu na huzuni, lakini kwamba upendo na rehema za Mungu vyaweza kufikia kina cha chini sana na kwamba Imani itaunua moyo unaotubu kushiriki kufanyika watoto wa Mungu. Kati ya uhakika wote ambao Neno Lake linatupatia, huu ni mojawapo wa ushuhuda wenye nguvu kwa Mungu mwaminifu, Mungu mwenye haki na Mungu wa rehema atunzaye maagano. . .

“ ‘Nimefanya agano na mteule Wangu, Nimemuapia Daudi, mtumishi Wangu. . . Mkono wako ni mkono wenye uweza, Mkono wako unazo nguvu, Mkono wako wa kuume umetukuka . . . Uaminifu Wangu na fadhili Zangu atakuwa nazo, Na kwa jina Langu pembe yake itatukuka. Nitaweka mkono wake juu ya bahari, Na mkono wake wa kuume juu ya mito. Yeye ataniita, Wewe baba yangu, Mungu wangu na mwamba wa wokovu wangu. Nami nitamjalia kuwa mzaliwa Wangu wa kwanza, Kuwa juu sana kuliko wafalme wa dunia. Hata milele nitamwekea fadhili zangu, Na agano langu litafanyika amini kwake.’ *Zaburi 89:3–28.*” — Ellen G. White, *Wazee na Manabii, Sehemu ya Pili*, uk. 418, 419.

Maswali ya Kujadili:

1 Jamii ya wanadamu imeshindwa kabisa kuwa waaminifu kwa upande wetu wa agano la Mungu alilofanya nasi. Daudi, “mtu aupendezaye moyo wa Mungu” licha ya makosa fulani makubwa, bado alitumiwa kwa namna yenye nguvu kutujulisha masharti ya wokovu wetu. Ni katika maana gani Daudi anakuwa kivuli cha Yesu, ambaye alishika agano la Mungu kikamilifu kwa ajili yetu? Na kwa nini kile Yesu alichofanya kwa ajili yetu ni tumaini letu pekee?

2 Ni vifungu gani katika Zaburi ambavyo ni vyenye manufaa au maana hasa kwa kuwa vinaakisi aina ya uzoefu ulioupitia wewe mwenyewe? Kwa nini Zaburi zinarejelea hekalu mara kwa mara? Tunaweza kujifunza nini kutokana na Daudi kupapenda sana patakatifu? Hili linawezaje kutusaidia kuthamini kile tulicho nacho katika Yesu, kama Kuhani wetu Mkuu wa mbinguni ambaye “yuko hata mkono wa kuume wa Mungu, tena ndiye anayetuomba” (Rum. 8:34)? Kwa nini sisi, hata kama ni watu waliokombolewa, tunahitaji uombezi wa Kristo mbinguni?

3 Kutokana na nukuu ya Ellen G. White hapo juu, uzoefu wako mwenyewe umekuwaje kuhusu jinsi Mungu alivyoitua “moyo unaotubu kushiriki kufanyika watoto wa Mungu” baada ya “aibu na huzuni” ya dhambi?